

一貫道原典系列

三三歸一 ⑤

不虛先生講
歸一子整理

(續上期)

成曰：水祖掌普度之盤，蓋天授非人授，敢問天元掌收圓之盤，果人傳，抑天傳乎？

答曰：水祖之盤，天元亦不能親受，而天人交接，冥冥之中，自有以授之，非人之所能測度也。

成曰：收圓之盤，空中暗授，聞假收圓有二十四，知何者為真乎？

答曰：假者大都有形有象，或示法力，或顯道行，於人之貪狂癡妄者而誘之，與正道相去天淵。若真收圓者，上承天命，下體祖德，整規飭矩，憂勤惕厲，言足為坊，行足為表，有威可畏，有儀可象，德高天下而不自以為德，才高天下而不自恃其才，笑容可掬，大度能容，見者生敬，聞者生慕，蓋真則無往而不見其真也，而豈假者之可得而混乎。

成曰：天元掌收圓，固真矣，然水祖之盤，由天授，實因道統之有變也，而天與天元之盤，何弗循祖祖相傳之常乎？

答曰：此所謂希奇考，亦顛倒考也，蓋天心最公，原人九六，九二為殘靈，其四億，則皆於此時而立功證果，若收圓之統，亦循祖祖相傳之常，則普度之領袖，復為收圓之領袖，普度未得志者，終無展布之時矣。故暗轉盤心，使普度有志未逮之人，皆得以大展經綸，共襄盛舉，而立不世之功，證不朽之果也。

成曰：有掌普度之教者，即有佐普度之人，有掌收圓之教者，即有佐收圓之人，此理誠正，但普度之領袖，若肯來助收圓，掌收圓者，其能拒之乎？

答曰：不惟不拒之，而且迎之也，蓋領袖



歸，則所屬盡歸，其成功為較易，但普度之領袖，必不來歸收圓，此固天意，亦人之自失機緣，自誤前程也。蓋辦普度者，經營有年，辛苦有年，今幸而當一方之領袖，竭力供奉者若而人，奔走承順者若而人，喜怒由己，威福由己，其尊榮為何如，忽焉而聞後來者居上，其誰肯低首下心以相從乎，此所以必不來歸收圓也。

成曰：既不來歸，則必誘阻，以普度之領袖，而人人誘之，人人阻之，收圓何由得成乎？

答曰：所謂收圓者，非謂九六原人，一時盡圓也，蓋原人九六，諸佛則止四億，而玉蓮又僅萬朵，辦收圓者，於四億之中，選擇萬靈，但使德當天心，可受萬朵玉蓮而無愧者，三乘九品既定，倏忽之間，天機一動，而千門萬教，皆歸於一堂矣。所以然者，奉天命以收圓，夫自有以成之，而豈人之所能阻乎。

成曰：萬靈之數，普度已取齊矣，收圓又取萬靈，玉蓮豈其又增萬朵乎？

答曰：萬靈之數，固由人取，而萬朵之蓮，則自天定。蓋普度之領袖，未能畢萬靈之選，又一之以收圓，或收圓之領袖，又有愧萬靈之選者，夫必復擇大功大德，未當領袖者以易之，而足萬朵之數也，此萬靈所以由天定非人定也。

成曰：今者普度已開，收圓期臨，辦收圓者，必如何行之而始可當萬靈之選也。

答曰：收圓之事，較普度為易成，而辦收圓之人，則較辦普度為難得，蓋普度如開荒故甚難，收圓如秋收故較易也。至於辦普度之人，但能度己，即能度人，苟有才識有膽量者皆可為也。若辦收圓之人，必收自己之圓，乃可以收天下之圓。非德不足以感人，是何也？蓋自普度以來，一切機巧變詐之事，見之多故防之密，一言偶失，一行偶疏，不惟動人之疑，而且予人以口實，故必先收自己之圓，而後可收天下之圓也。

成曰：請問收自己之圓何如？

答曰：如身內收圓，然必收心猿、收意馬，鍊已純熟，而後可以還丹，又必收四門、收六識、三花聚、五炁凝，萬脈歸根，而後一性圓明，身內之收圓不易如此，況收天下之圓乎？是必內收氣質，外收行持，一切人我憤高、奸貪嫉妒，種種不悅於人者，一併收之忍辱袋中，而又活潑圓通，不露圭角，內極精明，外極渾厚，敬上愛下，克己和人，佛規則甚嚴整，氣象卻又和平，平時信實溫恭，以身作則，臨事寬容忍耐，曲體人情，盛德之感人，如春風之被物；夫然後近者悅服，遠者懷之，乃可以收天下之圓，而當

萬靈之選也。不然，言動放肆，不知收束，菱角峭厲，不能圓融，人皆畏之忌之，夫亦必陰除其名，而另選有德者當之，是雖辦收圓之事，而終不能成其功，雖在萬靈之數，而終不能保其位也，此所以欲收天下人之圓，必先收自己之圓也。

成曰：必收自己之圓，而後可收天下人之圓，而備萬靈之數，是知使奸用詐者，非萬靈之選也。搶功奪果者，非萬靈之選也。貪財利己肥家潤身者，非萬靈之選也。滅祖欺師違悖謬行者，非萬靈之選也。愛奉承喜逢迎權勢壓人者，非萬靈之選也。好奢華享厚福銀錢濫用者，非萬靈之選也。分門別戶，稱師作祖，欺人欺心，欺理欺天者，非萬靈之選也。面是背非，陽奉陰違，口弄兩舌，足踏兩船者，皆非萬靈之選也。中庸曰：「苟不至德，至道不凝。」三才同此一道，三才非德，不能歸於一也。三教同此一道，三教非德，亦不能歸於一也。三期同此一道，三期非德，總不能歸於一也。今而知普度收圓，萬靈定品，立大功而證大果，非大德不足以載之也，幸承先生之教，敢不刻骨銘心，終身佩服乎。

（全文完）